

編號 1 號

【香絲樹<sup>1</sup>花開】邱一帆原作

四月底、五月初白色浪漫个油桐花，像白鶴仔樣跔等風飛啊飛仔，漸漸仔離開咁山林。過無幾久个時間，對莊項看向對面山个樹林頂，金黃金黃个色彩，一搭一搭染上咁山頭，就像人个頭那毛，跔等時行染色，金黃色个香絲樹花，開哩！青青个山頭，對染上一片白色，到染過一款黃色，換上無共樣个色目，逐儕人係有看著，係毋係會在自家个心肝肚激出一款相思，係毋係會產生無共樣个感覺，有咁無共樣个心情感受呢？

望向遠方个童年，香絲樹就生在上坪个陂塘脣，高大个樹形，遮天蔭地，映照矮細、孤栖个厝。厝摘下一皮青青、幼幼長條形个葉仔，掄掄啊<sup>2</sup>放在鼻公頭，就鼻著該清香、醒腦个味緒。葉仔擲落陂塘肚，浮在陂塘面頂，該歸群个鯽魚仔，怕係聽著該葉仔跌落个聲，抑係鼻著該熟事个味道，一下濟濟掙<sup>3</sup>、嘴緊吮等來。就像係這下當多遊樂區、餐廳前个陂塘項，輒常看得著个，分人餵慣个鯉魚抑係福壽仔，上合合仔个樣仔。恁著厝還細時

節，乜識目珠盯盯，看等搞伴仔手項拿等个冰淇淋，口涎水一下汀汀汀汀……。

香絲樹花開，細細蕊、黃黃个花襯等青青个樹葉，遠遠看啊去仰般打眼，仰般錫人个目光。有人看著，會想起該燒火炭个時節，日合夜掌等炭窯，係為著燒出靚靚个香絲火炭；有人看著，會講起該拖木馬<sup>4</sup>个日仔，香絲樹筒疊出个木馬路，對山頂到山下拖運大樹筒，變到幾多儕人衰過个黃泉路；有人看著會恁起該打炭个歲月，通向地泥下个炭坑，幾多个香絲枕木墊等、幾多个香絲樹楯撐等打炭工个生命倚恃！

對面山个樹林肚，香絲樹緊生緊大頭。毋過這下，礦坑既經封忒，無人再拿來做枕木、做樹楯；斬大樹、運樹筒个人，這下毋使用著木馬；用香絲樹燒火炭个人家、炭窯，乜緊來緊少，緊來緊罕得看著，淨留下山頂高个香絲樹，年年在五、六月開出金黃色个花。

<sup>1</sup> 香絲樹：音 hiong' xi' su；相思樹。

<sup>2</sup> 掄掄啊：音 nun` nun` a；揉一揉。

<sup>3</sup> 濟濟掙：音 ji ji qiu'；擠滿。

<sup>4</sup> 拖木馬：音 to' mug` ma'；木製拖板，人力拉運木材。

編號 2 號

【蟻公行軍】黃秋枝原作

該日，在廳下个壁角，看著一陣無看過个蟻公，細細隻仔，係無細義看，還正經會分佢走過詐。一隻接一隻跔等地磚个縫仔，排列到像一條烏線。

老弟緊拚拚仔，扯面紙想愛摺佢抹忒，但係佢想研究一下仔，毋知佢這兜對哪來？又愛去到哪？老妹哇哇滾，酒精罐噴頭對等蟻公就愛洩，旨知酒精一洩，蟻公就分佢噴到四四散散拆陣吔，無幾久酒精揮發忒，蟻公醉醒，又趕上趕下吔。

老弟好擲擲仔換拿等膨鏡，伏落地泥下，佢兼緊看：「阿姊你兜來看！蟻公會講話呢！」

佢在老弟个手頂接著膨鏡乜伏落地泥下：「正經呢，佢兜相堵頭个時節，還會迪凸一下，當像相借問講：『你好無？』」老妹乜搶等愛聽蟻公講話！三姊妹就恁仔伏在地泥下，看吔歸半晝邊仔。

背尾，蟻公像阿兵哥行軍樣仔，共樣个速度緩緩仔又行轉一列。親像勇敢个小尖兵，無起懼<sup>1</sup>著種種个阻礙同生命个危險，衝

破難關排列過出發。

佢懊惱，屋下打掃到恁淨俐，仰會生蟻公呢？毋過心肝又疑狐：這陣看起來毋打眼个蟻公，敢係有哪種神祕个指令同意志，堅持湊等行共隻方向摺固定个路徑。後來，佢查生物學个書，正知蟻公做得跔等環境个變化，改變工蟻、兵蟻同雄蟻个性別摺數目比例，每一隻蟻公看起來像係獨立个生命個體，但係同時係「歸陣蟻公」个一細垵拼圖。在時間同空間以外，原有一種生命「存在」个方式，「打散」在「群體」个裡背。

當在該查資料个時節，阿姆對外背轉來。

「阿姆，阿姊在該看書；阿哥在該掌蟻公；佢在該聽蟻公講話……。」老妹聽著阿姆買菜轉來个聲，走前去同阿姆詳細報告「蟻公行軍」新發現个一晝邊。

「會落雨吔，『蟻公搬屋魚反塘，三日大路變湖洋。』」阿姆講，蟻公做得預感空氣个溼度，在佢兜試著溼度忒大个時節就知愛落雨吔，故所愛徙到較高、較安全个地方去。還講「魚反塘」乜共樣，天時係熱，魚塘个水、溫度忒高，會有魚仔嗶嗶啵啵跳个異象，無幾久乜會死忒唷！

「哦，原來係恁樣哦！」看蟻公行軍个一晝邊，無想著頭擺人个生活經驗乜恁豐富！

<sup>1</sup> 懼：音 ki / ki'；害怕，恐懼。

編號 3 號

【靚靚个東眼山】謝宜庭原作

車仔定定仔駛過彎彎幹幹个山路，佢伸手同車仔个窗門掀下來，雨毛仔就緊拚拚仔跔等清風舂入來，帶分人一陣清涼。

山路脣个圍欄頂頂，拓拓風有幾團咖啡色个身影，在該跳上跌落。佢看到目珠擎到大嫫隻，原來係幾隻細猴仔來同佢兜相借問啊。毋過嘅一瞞目又走到尾瀉屎哩。

雨停咧，涼習習仔个山林肚，空氣裡背園等淡淡个清香，錫到大家相賽行入這靚靚个樹林肚。山路脣間等蓬白蓬白个濛沙煙，就像新娘同等个白紗，分人忍毋核想愛行兼去掀開這層層个面紗，來看新娘該畏羞又得人惜个面容。

一步一步行往前，就像行入仙境。路脣草排肚个蜷崎絲頂頂，掛等淦淦个水珠仔，分對雲海肚探頭出來个日頭絲晟啊過，一瞞一瞞金皙皙仔，像一張一張金晶積亮<sup>1</sup>个水晶網仔，實在靚到講毋得。

耳公脣傳來蟬仔<sup>2</sup>「唧——唧——唧——唧——」个聲，佢追

等這抽骸另命个聲哨，在大樹頂頂尋著一隻蟬仔，脣頭還著等一個蟬仔殼。聽講該又安到「蟬蛻」抑係「蟬衣」，係一味辛涼解表个中藥哦！佢輕輕仔撈這蟬仔歌手同蟬仔殼對樹頂捉下來，分細人仔摸看啊厥薄薄个翼。佢兜擘開目珠金金看，儕儕看到當入文，總算知得麼个係「薄如蟬翼」，麼个又安到「金蟬啟殼」，大自然實在還生趣哪！

佢打開手撈蟬仔放走，得著自由个佢，黏時閃入青里里个樹林肚，加入「蟬仔合唱團」，又歡歡喜喜在該啦歌哩曲哩。連揚蝶仔小姐乜閑閑自家靚靚个翼，盡命拈在樹林肚飛上飛下，舞到活跳又輕連，錫人來共下跳舞。無胚著，雨後个樹林會恁鬧熱煎煎。

山路尾接等長長个細石頭路，路脣種有歸排个楊梅樹。一粒粒青間<sup>3</sup>紅个楊梅子，分雨打到歸地泥，還打爽哪！佢偷偷仔拈起幾下粒，像手指甲恁大仔个楊梅子，對細人仔擎等个遮仔頂擲過去，並令砰朗響無停。佢兜「木匠拉大鋸——有來有去」乜跔下來拈楊梅子擲轉來。在這條一窩一窟个石頭路頂，儕儕歡喜到耐毋得。

天頂高緊曠燼又響雷公，喊頭大雨怕會來哩，遽遽來去轉哩啲！靚靚个東眼山、得人惜个揚蝶仔同蟬仔歌手，有閒正來奈！

<sup>1</sup> 金晶積亮：音 gim' jia' jid' lang；物品的外貌亮晶晶。

<sup>2</sup> 蟬仔：音 sam' e'；蟬，動物名。

<sup>3</sup> 間：音 gam；夾雜。

編號 4 號

【行出第一步】劉懿玲原作

人生有當多个「第一擺」，比將講還細時節第一擺騎自行車、第一擺蹶大山，出社會過後第一擺尋頭路、面試。第一擺總係分人印象當深，因爭「萬事起頭難」，愛行出第一步無恁該，需要當大个勇氣同決心。

佢印象盡深个第一擺，係參加演講比賽。在參加比賽前佢就在網路頂看過別人比賽个影片，想講人家仰恁慶，在臺頂講到口涎波潑完全毋會緊張？乜問自家：「佢敢做得著？」老古人講「敢去就一擔樵，毋敢去就屋下愁」，該央時佢單淨一個「毋怕，挑戰看啊」个想法，就慇慇四个報名落去。

準備比賽个過程，心情就像洗三溫暖樣仔，表現好就歡喜露天，表現差該下嘎又額結結仔當慍悴。正開始練習个時節，單淨企在臺頂講兩句話就緊張到激激顫<sup>1</sup>，成時還講到迪迪凸凸、結舌締確。有一擺練習，佢在臺頂講無一分鐘，續下來愛講麼个全部毋記得淨淨，就恁樣在臺頂「罰企」到鈴仔響正下臺。下臺个時節佢敗勢到面紅濟炸，見笑到尋無空好園，實在有罅慘啊！

人講「人愛人打落，火愛人燒著」，經過這擺失敗个經驗，佢同自家講定著愛較增志兜仔，做毋得過發生共樣个情況。想起指導佢个先生識講過：「準備个過程若係每一步行來實實疊疊，自然上臺就毋會緊張。」故所佢開始調整自家準備个方法，多看新聞同文章、多聽別人个經驗摻見解、多寫演講稿仔、多練習企在臺頂講話，還過練習過後有問題就多問、多請教。就恁樣一步一腳跡，漸漸仔試著自家个表現有息把仔進步，上臺毋會過恁緊張也。

總算，到咧上臺比賽這最關鍵个一步，俗話講：「臺上三分鐘，臺下十年功。」雖然佢無花到十年个時間，毋過因爭有平常个煞猛練習做基礎，分佢在臺頂講來順順序序、自信淦淦。

在講煞下臺行禮該一瞞目，吾腦膈肚想起一幕幕自開始準備到這下一路項練習个畫面。過程中有辛苦、懊惱，也有快樂、歡喜，不管比賽个結果仰般，好在該央時決定行出第一步來報名參加比賽，這擺寶貴个經驗定著會變做佢未來生活个養分！

<sup>1</sup> 激激顫：音 gid gid zun'；發抖。

編號 1 號

【香絲樹<sup>1</sup>花開】邱一帆原作

四月底、五月初白色浪漫个油桐花，像白鶴樣跔等風飛啊飛仔，漸漸仔離開山林。過無幾久个時間，對莊肚看向對面山个樹林頂，金黃金黃个色彩，一搭一搭染上山頭，就像係頭那毛，跔等時行染色，金黃色个香絲樹花，開哩啲！青青个山頭，對染上一遍白色，到染過一款黃色，換起無共樣个色目，逐個人係有看著，係毋係會在自家个心肝肚激出一種相思？係毋係會產生無共樣个感覺？有無共樣个心情感受呢。

看向遠方个童年，香絲樹就生在上坪个陂塘脣，高大个樹形，遮天蔭地，映照矮細、孤栖个涯。涯摘下一皮青青、幼幼長條形个葉仔，掄掄仔<sup>2</sup>放在鼻空頭，就鼻著該清香合分人精神个味道。葉仔擲落陂塘肚，浮在陂塘面頂，歸群个鯽魚仔，怕係聽著該葉仔跌落个聲響，抑係鼻著該熟事个味道，一下擠擠拏<sup>3</sup>、嘴緊吮等來。就像係這下當多遊樂區、餐廳前个陂塘肚，輒常看得著个，分人餵慣个鯉魚抑係福壽仔，上合合个樣仔。想著涯還細時

節，乜識目金金，看等搞伴仔手町拿等个軟冰，口水一下斯汀汀汀汀……。

香絲樹花開，細細蕊、黃黃个花襯等青青个樹葉，遠遠看啊去仰般打眼，仰般錫人个目光。有人看著，會想起該燒火炭个時節，日合夜掌等炭窯，係為著燒出靚靚个香絲火炭；有人看著，會講起該拖木馬<sup>4</sup>个日仔，香絲樹筒疊出个木馬路，對山頂到山下拖運大樹筒，變成幾多人衰過个黃泉路；有人看著會想起該打炭个歲月，通向地泥下个炭坑，幾多个香絲枕木墊等、幾多个香絲樹楯撐等打炭工个生命倚恃！

對面山个樹林肚，香絲樹緊生緊大頭。毋過這下，礦坑既經封忒，無人再過拿來做枕木、做樹楯；斬大樹、運樹筒个人，這下毋使用著木馬；用香絲樹燒火炭个人家、炭窯，乜緊來緊少，緊來緊罕得看著，單淨留下山頂个香絲樹，年年在五、六月開出金黃色个花。

<sup>1</sup> 香絲樹：音 hiong` si` shu+；相思樹。

<sup>2</sup> 掄掄仔：音 nun` nun` er；揉一揉。

<sup>3</sup> 擠擠拏：音 zi` zi` ciu`；擠滿。

<sup>4</sup> 拖木馬：音 to` mug ma`；木製拖板，人力拉運木材。

編號 2 號

【蟻公行軍】黃秋枝原作

該日，在廳下个壁角，看著一陣無看過个蟻公，細細隻仔，係無細義看，還正經會分佢走過詐。一隻接一隻跔等地磚个縫仔，排列到像一條烏線。

老弟緊拚拚仔，扯面紙想愛摺佢抹忒，但係佢想研究一下，毋知佢這兜對哪來？又愛去到哪？老妹哇哇滾，酒精罐个嘴對等蟻公就洩，盲知酒精一洩，蟻公斯噴到四四散散拆陣咧，無幾久酒精揮發忒，蟻公醉醒，又趲上趲下咧。

老弟好擲擲仔換拿等膨鏡，伏落地泥下，佷兼緊看：「阿姊你兜來看！蟻公會講話哦！」

佢在老弟个手町接著膨鏡乜伏落地泥下：「正經呢，佢兜相堵頭个時節，還會停下揆一下，當像相借問講：『你好無？』」老妹乜搶等愛聽蟻公講話！三姊妹就恁樣伏在地泥下，看歸半晝邊。

背尾，蟻公像阿兵哥行軍樣，用共樣个速度定定仔又行轉一列。盡像勇敢个細衛兵，無懼著<sup>1</sup>種種个阻礙摺生命个危險，衝破

難關排列過出發。

佢懊惱，屋下打掃到恁淨俐，仰會生蟻公呢？毋過心肝又疑狐：這陣看起來毋打眼个蟻公，敢係有哪種神祕个指令摺力量，堅持湊等行共隻方向摺固定个路線。後來，佢查生物學个書，正知蟻公做得跔等環境个變化，改變工蟻、兵蟻還過雄蟻个性別摺數目比例，逐隻蟻公看起來像係獨立个生命個體，但係同時係「歸陣蟻公」个一細垵拼圖。在時間摺空間以外，原來有一種生命「存在」个方式，「打散」在「群體」裡背。

當在該查資料个時節，阿姆在外背轉來。

「阿姆，阿姊在該看書；阿哥在該掌蟻公；佢在該聽蟻公講話……。」老妹聽著阿姆買菜轉來个聲，走前去摺阿姆詳細報告「蟻公行軍」新發現个一晝邊。

「會落水咧，『蟻公搬屋魚反塘，三日大路變湖洋。』」阿姆講，蟻公做得預先感覺空氣个溼度，在佢兜試著溼度忒大个時節就知愛落水咧，所以愛徙到較高岡、較安全个地方去。還講：「魚反塘乜共樣，天時係熱，魚塘个水溫度忒高，魚仔斯出現嗶嗶啾啾跳个現象，無幾久乜會死忒唷！」

「哦，原來係恁樣哦！」看蟻公行軍个一晝邊，無想著頭擺人个生活經驗乜恁豐富！

<sup>1</sup> 無懼著：音 mo ki' do'；不懼於人的威勢之下。

編號 3 號

【靚靚个東眼山】謝宜庭原作

車仔定定仔駛過彎彎幹幹个山路，佢伸手摺車仔个窗門掀下來，水毛仔就緊拚拚仔跔等清風舂等落來，帶分人一陣陣清涼。

山路脣个風圍頂，忽然間有幾團咖啡色个身影，在該跳上跌落。佢看到目珠睸到大嫫隻，原來係幾條細猴仔來摺佢兜相借問。毋過一瞞目又走到尾瀉屎咧。

水停咧，涼習習个山林肚，空氣裡背園等淡淡个清香，錫大家相賽行落這靚靚个樹林肚。山路脣間等蓬白蓬白个濛煙，斯像新娘同等个白紗，分人忍毋核想愛行兼去掀開這層層个面紗，來看新娘該畏羞又得人惜个面容。

一步一步行向前，斯像行落仙境樣。路脣草竇肚个蜷崎網頂，掛等淦淦个水珠，分對雲海肚探頭出來个日頭絲晟啊過，一瞞一瞞金皙皙仔<sup>1</sup>，像一張一張金晶百亮<sup>2</sup>个水晶網，實在靚到講毋得。

耳空脣傳來蟬仔「唧——唧——唧——唧——」个聲，佢追

等這嘶脰另命个聲哨，在大樹頂尋著一隻蟬仔，脣頭還有一隻蟬殼。聽講該又安到「蟬蛻」抑係「蟬衣」，係一味辛涼解表个中藥哦！佢輕輕仔摺這蟬仔歌手過蟬殼對樹頂捉下來，分細人仔摸看啊佢薄薄个翼。佢兜目珠睸金金看，儕儕看到當入文，總算知得麼个係「薄如蟬翼」，麼个又安到「金蟬脫殼」，大自然實在還生趣哪！

佢打開手巴掌摺蟬仔放走，得著自由个佢，黏時閃落青里里个樹林肚，加入「蟬仔合唱團」，又歡歡喜喜在該啦歌哩曲咧。連蝶仔小姐乜閑閑自家靚靚个翼胛，盡命牯在樹林肚飛上飛下，舞跳到活跳又趣妙，分人乜想愛來共下跳。無胚著，落過水後个樹林會恁樣鬧熱煎煎。

山路尾接等長長个細石牯路，路脣種有歸排个楊梅樹。一隻隻青合紅个楊梅，分水打到歸地泥，還打爽哪！佢偷偷拈起幾隻，像手指甲恁大个楊梅，對細人仔擎等个遮仔頂擲過去，並令砰浪<sup>3</sup>擲到砰砰滾。佢兜「木匠拉大鋸——有來有去」，乜跔下來拈楊梅擲轉來。在這條礫礫砣砣个石頭路町，儕儕歡喜又暢樂。

天頂緊瞞燿又響雷公，喊頭大水怕會來咧，遽遽來轉哩啲！靚靚个東眼山、得人惜个蝶仔摺蟬仔歌手，有閒正來奈！

<sup>1</sup> 金皙皙仔：音 gim` siag siag er；物品的外貌亮晶晶。

<sup>2</sup> 金晶百亮：音 gim` zin` bag lang；晶晶亮亮、光彩奪目的樣子。

<sup>3</sup> 並令砰浪：音 pin` lin` pong` long` / bin` lin` bong` long；形容如鞭炮聲的狀聲詞。

編號 4 號

【行出第一步】劉懿玲原作

人生有當多个「第一擺」，比論講還細時節第一擺騎自行車、第一擺蹶大山，出社會過後第一擺尋頭路、面試。第一擺總係分人印象深刻，因為「萬事起頭難」，愛行出第一步無恁該，需要當大个勇氣摺決心。

佢印象最深个第一擺係參加演講比賽。在參加比賽前佢斯在網路肚看過別人比賽个影片，看著佢兜仰會恁慶，在臺頂講到口涎波潑完全毋會緊張，乜問自家：「佢敢做得到？」老古人講：「敢去就一擔樵，毋敢去斯屋下愁。」該兩時佢單淨一隻「毋怕，挑戰看啊」个想法，就慇慇四報名落去。

準備比賽个過程，心情就像洗三溫暖樣，表現好斯歡喜靈天，表現差該下又額結結仔當慍悴。正開始練習个時節，單淨企在臺頂講兩句話就緊張到激激顫，成時還講到迪迪凸凸、結舌締確。有一擺練習，佢在臺頂講無一分鐘，續下來愛講麼个嘎全部毋記得淨淨，就恁樣在臺頂「罰企」到鈴仔響正下臺。下臺个時節佢敗勢到面紅濟炸，見笑到尋無空好園，實在還慘哦！

人講「人愛人打落，火愛人燒著」，經過這擺失敗个經驗，

佢摺自家講，定著愛較增志兜，做毋得過發生共樣个情況。想起指導佢个先生識講過：「準備个過程若係逐步行來實實疊疊，自然上臺就毋會緊張。」所以佢開始調整自家準備个方法，多看新聞摺文章、多聽別人个經驗摺見解、多寫演講稿、多練習企在臺頂講話，還過練習過後有問題斯多問、多請教。就恁樣一步一腳跡，漸漸仔試著自家个表現有兜仔進步，上臺毋會過恁緊張咧。

總算，到了上臺比賽這最關鍵个一步，俗話講：「臺上三分鐘，臺下十年功。」雖然佢無花到十年个時間，毋過因為有平常个煞猛練習做基礎，分佢在臺頂講來順順序序、自信淦淦。

在講煞下臺行禮該一瞞目之間，佢腦膈肚想起一幕幕對開始準備到這下一路練習个畫面。過程中有辛苦、懊惱，乜有快樂、歡喜，不管比賽个結果仰般，好得該兩時決定行出第一步來報名參加比賽，這擺寶貴个經驗定著會變成佢未來生活个養分！



編號 1 號

【香絲樹<sup>1</sup>花開】邱一帆原作

四月底、五月初白色浪漫个油桐花，像白鶴樣跔核風飛啊飛，漸漸離開山林。過無幾久个時間，對莊項看向對面山个樹林，金黃金黃个色彩，一搭一搭染上山頭，斯像係頭那毛，跔核時行染色，金黃色个香絲樹花，開咧！青青个山頭，對染上一片白色，到染過一款黃色，換過無共樣个色目，逐個人若有看著，係毋係會在自家个心肝肚激出一款相思，係毋係會生出無共樣个感覺，有無共樣个心情感受呢？

望向遠方个童年，香絲樹生在上坪个陂塘脣，高大个樹形，遮天蔭地，映照矮細、孤栖个厓。厓摘一皮青青、幼幼長條形个葉，換換嚟<sup>2</sup>放到鼻公頭，斯鼻著該清香合分人精神个味瑞。同葉擲落陂塘肚，浮在陂塘面頂，該歸陣个鯽魚，怕係聽著該葉跌落水個聲響，抑係鼻著該熟事个味瑞，一下擠擠拏<sup>3</sup>、嘴吮緊來。斯像係這下當多遊樂區、餐廳前个陂塘肚，輒輒看得著个，分人餵慣个鯽魚抑係福壽，合合上个樣。恁著厓還細時節，乜識目珠

盯盯，看緊搞伴手項拿核个冰淇淋，口涎水一下汀汀汀汀……。

香絲樹花開，細細蕊、黃黃个花襯核青青个樹葉，遠遠看過去係仰脣个打眼，仰脣个錫人目光。有人看著，會想起該燒火炭个時節，日合夜掌核炭窯，係為著燒出靚靚个香絲火炭；有人看著，會講起該拖木馬<sup>4</sup>个日，香絲樹筒疊出个木馬路，對山頂到山下拖運大樹筒，變做幾多人衰過个黃泉路；有人看著會恁起該打炭个歲月，通對地泥下个炭坑，幾多个香絲枕木墊緊、幾多个香絲樹楯撐核打炭工个生命倚恃！

對面山个樹林肚，香絲樹緊生緊大頭。毋過這下，礦坑既經封撇，無人過拿來做枕木、做樹楯；倒大樹、運樹筒圈个人，這下毋使用著木馬；用香絲樹燒火炭个人家、炭窯，乜緊來緊少，緊來緊罕得看著，淨留山頂个香絲樹，年年在五、六月開出金黃色个花。

<sup>1</sup> 香絲樹：音 hiong+ si+ shu`；相思樹。

<sup>2</sup> 換換嚟：音 nun^ nun^ le^；揉一揉。

<sup>3</sup> 擠擠拏：音 zi+ zi+ ciu+；擠滿。

<sup>4</sup> 拖木馬：音 to+ mug^ ma+；木製拖板，人力拉運木材。

編號 2 號

【蟻公行軍】黃秋枝原作

該日，在廳下个壁角，看著一陣無看過个蟻公，細細隻，若係無細義看，還正經會分佢走過詐。一隻接一隻跔核地磚个縫，齊整排列像一條烏線。

老弟緊拚拚，扯面紙想愛同佢抹撇，毋過佢想研究一下，毋知厥這兜對哪來？又愛去到哪？老妹哇哇滾，酒精罐嘴對緊蟻公斯愛射，旨知酒精一射，蟻公斯噴去四四散散拆陣咧，無幾久酒精散撇，蟻公醉醒，又趕上趕下咧。

老弟興嘟嘟換拿膨鏡，伏落地泥下，偎近緊看：「阿姊若等來看！蟻公會講話呢！」

佢對老弟手頂接過膨鏡乜伏落地泥下：「正經呢，厥等相堵頭个時節，還會頓恬一下，當像相借問講：『你好無？』」老妹乜搶緊愛聽蟻公講話！三姊妹斯恁泥伏在地泥下，看撇歸半晝邊。

背尾，蟻公像阿兵哥行軍个樣，共樣个速度定定又行轉一列。親像勇敢个細兵卒，一屑都毋驚種種个阻礙同生命个危險，衝破難關排列過出發。

佢懊惱，屋家拚都恁淨俐，仰會生蟻公呢？毋過心肝肚又疑狐：這陣看來毋打眼个蟻公，敢係有哪種祕密个指令同意志，堅持湊緊行共個方向同固定个路徑。臨尾，佢查生物學个書，正知蟻公使得跔核環境个變化，改變工蟻、兵蟻同雄蟻个性別同數量比例，逐隻蟻公看跔來像係獨立个生命個體，毋過同時又係「歸陣蟻公」个一細垵拼圖。在時間同空間以外，還有一種生命「存在」个方式，「打散」在「群體」个裡背。

當在該查資料个時節，阿姆對外背轉來。

「阿姆，阿姊在該看書；阿哥在該掌蟻公；佢在該聽蟻公講話……。」老妹聽著阿姆買菜轉來个聲，走去同阿姆詳細報告「蟻公行軍」个新發現。

「會落雨咧，『蟻公搬屋魚反塘，三日大路變湖洋。』」阿姆講，蟻公使得感知空氣个溼度，厥等試著溼度忒大个時節斯知愛落雨咧，所以愛徙到較高、較安全个所在去。還講「魚反塘」乜共樣，天時熱，魚塘个水溫度忒高，魚會嗶嗶啵啵跳，無幾久乜會死撇！

「哦，原來係恁泥哦！」看蟻公行軍个一晝邊，無想著頭擺人个生活經驗乜恁豐富！

編號 3 號

【靚靚个東眼山】謝宜庭原作

車定定駛過彎彎幹幹个山路，佢伸手同車窗搵落來，雨毛斯緊拚拚跔核清風從入來，帶分人一陣陣清涼。

山路脣个圍欄頂項玄玄風有幾團咖啡色个身影，在該跳上跌落。佢看去目珠擘都大嫫粒，原來係幾隻細猴來同吾等相借問啊。毋過一瞞目又走都尾瀉屎咧。

雨停咧，涼沁沁个山林肚，空氣裡背園核淡淡个清香，錫都大家相賽行入這靚靚个樹林肚。山路脣間緊蓬白蓬白个濛沙煙，斯像同緊新娘个白紗，分人忍毋核想愛行俾去掀開這層層个面紗，來看新娘該畏事又得人惜个面容。

一步一步行前去，斯像行入仙境。路脣草埔頂个蜘蛛網頂項，掛核粒粒个水珠，分對雲海肚探頭出來个日頭絲晟啊過，一瞞一瞞金皙皙，像一張一張金晶積燼<sup>1</sup>个水晶網，實在靚都講毋得。

耳公脣傳來蟬「咿——咿——咿——咿——」个聲，佢跔緊這抽肱另命个聲說，在大樹頂項尋著一隻蟬，脣項還著核一個蟬

殼。聽講該又安做「蟬蛻」抑係「蟬衣」，係一味辛涼解表个中藥哦！佢輕輕同這蟬歌手同蟬殼對樹頂捉落來，分細人摸看看，看厥薄薄个翼。厥等目珠金金緊看，逐個都看都當入文，總算知得麼个係「薄如蟬翼」，麼个又安做「金蟬脫殼」，大自然實在還生趣哪！

佢打開手巴掌放蟬走，得著自由个佢，黏時閃入青荷荷个樹林肚，加入「蟬合唱團」，又歡歡喜喜在該啦歌哩曲咧。連蝶小姐乜閑閑自家靚靚个翼，自由自在在樹林肚飛上飛落，活跳又生趣个舞，分人乜想同佢共下跳舞。無胚想著，落雨過後个樹林會恁鬧熱。

山路尾接核長長个細石頭路，路脣種有歸排个楊梅樹。一粒粒青合紅个楊梅，分雨打去落都歸地泥，還打爽哦！佢偷偷拈起幾粒，像手指甲恁大个楊梅，對細人擎核个遮頂擲過去，並令砰朗擲都砰砰滾。厥等「木匠拉大鋸——有來有去」乜跔落來拈楊梅擲倒轉來。在這條礫礫矸矸个石頭路頂，逐儕歡喜又樂暢。

天頂緊瞞燼又響雷公，喊頭大雨怕會來咧，遽遽來轉哩啲！靚靚个東眼山、得人惜个蝶同蟬歌手，有閒正來寮！

<sup>1</sup> 金晶積燼：音 gim+ zia+ zid` nen`；物品的外貌亮晶晶。

編號 4 號

【行出第一步】劉懿玲原作

人生有當多个「第一擺」，比將還細時節第一擺騎鐵馬、第一擺跋大山，出社會了後第一擺尋頭路、面試。第一擺總係分人印象當深，因為「萬事起頭難」，愛行出第一步無恁該，需要當大个勇氣同決心。

佢印象盡深个第一擺係參加演講比賽。在參加比賽進前，佢斯在網路項看過別儕比賽个影片，試著別人有罅慶，在臺項講都口涎波潑全全毋會緊張，乜問自家：「佢敢做得到？」老古人講「敢去斯一擔樵，毋敢去斯屋家愁」，該當時佢單淨一個「毋怕，挑戰看看」个想法，斯慇慇報名落去。

準備比賽个過程，心情斯像洗三溫暖个樣，表現好斯歡喜轟天，表現差該下斯額結結當慍悴。正開始練習个時節，單淨企在臺項講兩句話斯緊張去激激顫，成下還講都迪迪凸凸、結舌蒂確。有一擺練習，佢在臺項講無一分鐘，續落來愛講麼个做下毋記得了了，斯恁泥在臺項「罰企」到鈴鈴響正下臺。下臺个時節佢敗勢去面紅濟借，見笑都尋無空好園，實在有罅慘啊！

人講「人愛人打落，火愛人點著」，經過這擺失敗个經驗，

佢同自家講定著愛較增志兜，使毋得過發生共樣个情況。想起指導佢个先生識講過：「準備个過程若係每步行來實實疊疊，自然上臺斯毋會緊張。」所以佢開始調整自家準備个方法，多看新聞同文章、多聽別人个經驗同見解、多寫演講文稿、多練習企在臺項講話，還有練習過後有問題斯多問、多請教。斯恁泥一步一腳跡，漸漸試著自家个表現有一屑進步，上臺毋會過恁緊張咧。

總算，到上臺比賽這盡關鍵个一步咧，俗話講：「臺頂三分鐘，臺下十年功。」雖然佢無用著十年个時間，毋過因致有平常時个煞猛練習做基礎，分佢在臺頂講來順順勢勢、自信淦淦。

在講煞下臺行禮該下，吾腦膈肚想起一幕幕自開始準備到這下一路里來練習个畫面。過程肚有辛苦、懊惱，乜有快樂、歡喜，不管比賽个結果仰脣，好在該央時決定行出第一步來報名參加比賽，這擺寶貴个經驗定著會變做吾未來生活个養分！

編號 1 號

【香絲樹<sup>1</sup>花開】邱一帆原作

四月底、五月初白色浪漫个油桐花，像白鶴樣跔等風飛啊飛仔，漸漸離開了山林。過無幾久个時間，對莊肚脛向對面山个樹林頂，金黃金黃个色彩，一搭一搭染上了山頭，就像係頭那毛，跔等時行染色，金黃色个香絲樹花，開哩！青青个山頭，對染了一片白色，到染過一款黃色，換了無共樣个色目，逐儕人係有脛著，係毋係會在自家个心肝肚激出一款相思，係毋係會產生無共樣个感覺，有了無共樣个心情感受呢？

望向遠方个童年，香絲樹就生在上坪个陂塘脣，高大个樹形，遮天蔭地，映照矮細、孤栖个厝。厝摘下一皮青青、幼幼長條形个葉仔，掄掄啊<sup>2</sup>放到鼻空頭，就鼻著該清香、醒腦个味緒。葉仔擲落陂塘肚，浮在陂塘面，該歸群个鯽魚，怕係聽著該葉仔跌落个聲響，抑係鼻著該熟事个味道，一下擠擠掙<sup>3</sup>、嘴緊吮等來。就像係這下當多遊樂區、餐廳前个陂塘肚，輒常脛得著个，分人飼慣个鯽魚抑係福壽仔，上合合个樣仔。想著厝還細時節，

<sup>1</sup> 香絲樹：音 hiongˋ siˋ shuˊ / hiongˋ siˋ su；相思樹。

<sup>2</sup> 掄掄啊：音 nunˋ nunˋ aˋ / nunˆ nunˆ aˆ；揉一揉。

<sup>3</sup> 擠擠掙：音 ziˋ ziˋ ciuˋ；擠滿。

乜識目珠盯盯，脛等爽伴仔手提等个冰淇淋，口涎水一下汀汀汀汀……。

香絲樹花開，細細蕊、黃黃个花襯等青青个樹葉，遠遠脛啊去仰般打眼，仰般錫人个目光。有人脛著，會想起該燒火炭个時節，日合夜掌等炭窯，係為著燒出靚靚个香絲火炭；有人脛著，會講起該拖木馬<sup>4</sup>个日仔，香絲樹筒疊出个木馬路，對山頂到山下拖運大樹筒，變到幾多儕人衰過个黃泉路；有人脛著會想起該燒炭个歲月，通向地泥下个炭空，幾多个香絲枕木墊等、幾多个香絲樹楯撐等燒炭工个生命倚恃！

對面山个樹林肚，香絲樹緊生緊大頭。毋過這下，炭空既經封忒，無人再提來做枕木、做樹楯；斬大樹、運樹筒个人，這下毋使用著木馬；用香絲樹燒火炭个人家、炭窯，乜緊來緊少，緊來緊罕得脛著，淨留下山頂个香絲樹，年年在五、六月開出金黃色个花。

<sup>4</sup> 拖木馬：音 toˋ mugˋ maˋ；木製拖板，人力拉運木材。

編號 2 號

【蟻公行軍】黃秋枝原作

該日，在廳下个壁角，睺著一陣無睺過个蟻公，細細隻仔，係無細義睺，還正經會分佢走過榨。一隻接一隻跔等地磚个縫仔，排列到像一條烏線。

老弟緊拚拚仔，扯面紙想愛摺佢抹忒，但係佢想研究一下，毋知佢這兜對哪來？又愛去到哪？老妹哇哇滾，酒精罐嘴對等蟻公就愛洩，盲知酒精一洩，蟻公就噴到四四散散拆陣了，無幾久酒精揮發忒，蟻公醉醒，又趲上趲下了。

老弟好擲擲仔換提等膨鏡，伏落地泥下，佷兼緊睺：「阿姊你兜來睺！蟻公會講話哦！」

佷對老弟个手接著膨鏡乜伏落地泥下：「正經呢，佢兜相堵頭个時節，還會宕揆一下，當像相借問講：『你好無？』」老妹乜搶等愛聽蟻公講話！三姊妹就恁樣伏在地泥下，睺了歸半晝。

背尾，蟻公像兵仔行軍樣，用共樣个速度慢慢仔又行轉一列。親像勇敢个兵卒仔，毋驚種種个阻礙摺生命危險，打破難關排列再過出發。

佷盡懊惱，屋下拚掃到恁淨俐，仰會生蟻公呢？毋過心肝又

疑狐：這陣睺起來毋上眼个蟻公，敢係有哪種祕密个指令摺意志，堅持湊等行共隻方向摺固定个路線。後來，佷查生物學个書，正知蟻公做得跔等環境个變化，改變工蟻、兵蟻摺雄蟻个性別摺數量比例，逐隻蟻公睺起來像係獨立个生命，毋過同時係「歸陣蟻公」个一細垵拼圖。在時間摺空間以外，原旦有一種生命「存在」个方式，「打散」在「群體」个裡背。

當在該查資料个時節，阿姆在外背轉來。

「阿姆，阿姊在該睺書；阿哥在該掌蟻公；佷在該聽蟻公講話……。」老妹聽著阿姆買菜轉來个聲，走前去摺阿姆詳細報告「蟻公行軍」个新發現。

「會落雨了，『蟻公搬屋魚反塘，三日大路變湖洋。』」阿姆講，蟻公做得感覺著空氣个溼度，佢兜試著溼度忒大个時節就知愛落雨了，所以愛徙到較高、較安全个地方去。還講「魚反塘」乜共樣，天時係熱，魚塘个水，溫度忒高，魚仔會嗶嗶跳，無幾久乜會死忒唷！

「哦，原來係恁樣哦！」睺蟻公行軍个一晝邊，無想著頭擺人个生活經驗乜恁豐富！

編號 3 號

【靚靚个東眼山】謝宜庭原作

車定定仔駛過彎彎幹幹个山路，佢伸手撈車仔个窗門掀下來，雨微仔就緊拚拚跔等清風舂入來，帶分人一陣陣清涼。

山路脣个柵欄頂高，忽然間有幾團咖啡色个影跡，在該跳上跌落。佢睺到目珠擎到大嫫隻，原來係幾隻細猴仔來撈佢兜相借問啊。毋過噯一瞞目又走到尾瀉屎哩。

雨停了，涼習習个山林肚，空氣裡背肚囤等淡淡个清香，錫到大家相賽行入這靚靚个樹林肚。山路脣間等蓬白蓬白个濛沙煙，就像同等新娘个白紗，分人忍毋核想愛行兼去掀開這層層个面紗，來睺新娘該畏羞又得人惜个面容。

一步一步行往上，就像行入仙境。路脣草排肚个蜷崎網頂高，懸等淦淦个水珠仔，分對雲海肚探頭出來个日頭絲晟啊過，一瞞一瞞金皙皙仔，像一張一張金脂百亮<sup>1</sup>个水晶網仔，實在靚到奈毋得。

耳空脣傳來蟬仔「唧——唧——唧——唧——」个聲，佢追等這抽肱另命个聲哨，在大樹頂尋著一隻蟬仔，脣頭還著等一隻

蟬仔殼。聽講該又安到「蟬蛻」抑係「蟬衣」，係一味辛涼解表个中藥哦！佢輕輕仔撈這蟬仔歌手撈蟬仔殼對樹頂捉下來，分細人仔摸睺啊佢薄薄个翼。佢兜擎開目珠金金睺，儕儕睺到當入文，總算知得麼个係「薄如蟬翼」，麼个又安到「金蟬脫殼」，大自然實在還心色哪！

佢打開手撈蟬仔放走，得著自由个佢，黏時閃落青里里个樹林肚，加入「蟬仔合唱團」，又歡歡喜喜在該啦歌哩曲哩。連蝶仔小姐乜閉開自家靚靚个翼胛，盡命拈在樹林肚飛上飛下，舞到活跳又趣妙，分人也想愛來共下跳舞。無胚著，雨後个樹林肚會恁鬧熱煎煎。

山路後尾接等長長个細石牯路，路脣種有歸排个楊梅樹。一粒粒青呵紅个楊梅子，分雨打到歸地泥，還打爽哪！佢偷偷拈起幾粒，像手指甲恁大个楊梅子，對細人仔擎等个遮仔頂高擲過去，並令砰朗擲到砰砰滾。佢兜「木匠拉大鋸——有來有去」乜跔下來拈楊梅子擲轉來。在這條礫礫矻矻个石牯路町，儕儕歡喜又暢樂。

天頂緊瞞燿又響雷公，喊頭大雨怕會來哩，遽遽來轉哩啲！靚靚个東眼山、得人惜个蝶仔撈蟬仔歌手，有閒正來奈！

<sup>1</sup> 金脂百亮：音 gimˋ zhiˋ bagˋ langˋ / gimˋ ziˋ bagˋ langˋ；物品的外貌亮晶晶。

編號 4 號

【行出第一步】劉懿玲原作

人生有當多个「第一擺」，比論講還細時節第一擺騎自行車、第一擺蹶大山，出社會過後第一擺尋頭路、面試。第一擺總係分人印象當深，因爭「萬事起頭難」，愛行出第一步無恁該，愛有當大个勇氣摺決心。

佢印象最深个第一擺係參加演講比賽。在參加比賽前佢就在網路睇過別人比賽个影片，睇著別儕仰恁慶，在臺頂講到口涎波潑完全毋會緊張，乜問自家：「佢敢做得著？」老古人講「敢去就一擔樵，毋敢去就屋下愁」，該量時佢單淨一隻「毋怕，試拚睇啊」个想法，就慇慇四報名落去。

準備比賽个過程，心情就像洗三溫暖樣，表現好就歡喜霍天，表現差該下嘎又額結結仔當慍悴。正開始練習个時節，單淨企在臺頂講兩句話就緊張到激激顫，成時還講到迪迪凸凸、結舌締確。有一擺練習，佢在臺頂講無一分鐘，續下來愛講麼个全部毋記得淨淨，就恁樣在臺頂「罰企」到鈴仔響正下臺。下臺个時節佢敗勢到面紅濟炸，見笑到尋無空好園，實在有罅慘啊！

人講「人愛人打落，火愛人點著」，經過這擺失敗个經驗，

佢摺自家講定著愛較增志兜仔，做毋得再過發生共樣个情況。想起指導佢个先生識講過：「準備个過程若係逐步行來實實疊疊，自然上臺就毋會緊張。」所以佢開始調整自家準備个方法，多睇新聞摺文章、多聽別人个經驗摺見解、多寫演講稿、多練習企在臺頂講話，還過練習過後有問題就多問、多請教。就恁樣一步一腳跡，漸漸仔試著自家个表現有兜仔進步，上臺毋會過恁緊張了。

總算，到了上臺比賽這最關鍵个一步，俗話講：「臺上三分鐘，臺下十年功。」雖然佢無花到十年个時間，毋過因爭有平常个煞猛練習做基礎，分佢在臺頂講來順順序序、自信恹恹。

在講煞下臺行禮該一下，佢腦膈肚想起一幕幕自開始準備到這下一路里來練習个畫面。過程肚有辛苦、懊惱，也有快樂、歡喜，不管比賽个結果仰般，好在該量時決定行出第一步來報名參加比賽，這擺寶貴个經驗定著會變做佢未來生活个養分！



編號 1 號

【相思樹花開】邱一帆原作

四月底、五月初白色浪漫个油桐花，像白卵驚恁跔風飛啊飛，漸漸仔離開山林。過無幾久个時間，對莊底脛向對面山个樹林嶼，金黃金黃个色彩，一搭一搭染上山頭，即像係頭那毛，跔時行染色，金黃色个相思樹花，開啊！青青个山頭，對染上一片白色，到染過一款黃色，換上無共款个色地，逐儕若有脛著，係毋係會在自家个心肝底激出一款相思，係毋係會產生無共款个感覺，有無共款个心情感受呢？

望向遠方个童年，相思樹即生在上坪个魚塘脣，高大个樹形，遮天蔭地，映照矮細、孤單个厝。厝捋一皮青青、幼幼長條形个葉，按按个<sup>1</sup>園到鼻空頭前，即鼻著遐清香、醒腦个氣味。葉跌落魚塘內，浮在魚塘面上，遐歸陣个鯽魚，驚係聽著遐葉跌落个聲，抑係鼻著遐熟事个味，一下尖尖俛、嘴直直啣過來。親像係這滿真多遊樂園區、餐廳頭前个魚塘內，輒輒脛會著个，得人飼慣勢个鯽魚抑係南洋鯽，枵渴渴个樣。想著厝細漢時，嘛識目珠金金，脛寮伴手底提蹓个冰淇淋，口涎水一下落落汀……。

<sup>1</sup> 按按个：音 nui` nui` e；揉一揉。

相思樹花開，細細蕊、黃黃个花襯青青个樹葉，遠遠脛過去恁顯目，恁錫人个目光。有人脛著，會想起燒火炭个時，日合夜顧炭窯，係為著燒出靚靚个相思火炭；有人脛著，會講起遐站拖木馬<sup>2</sup>个日子，相思樹身疊出个木馬路，對山嶼到山下拖運大樹箍，變成幾多人苦憐个黃泉路；有人脛著會想起遐燒火炭个歲月，通向泥下个炭坑，幾多个相思枕木墊个、幾多个相思樹身撐蹓係火炭工个生命俛靠！

對面山个樹林內，相思樹越生越大頭。毋過這滿，礦坑已經封莫，無人攔提來做枕木、做樹砧；裁大樹、運樹材个人，這滿毋使用著木馬；用相思樹燒火炭个人家、炭窯，嘛越來越少，越來越罕得脛著，單單留落山嶼高个相思樹，年年在五、六月開出金黃色个花。

<sup>2</sup> 拖木馬：音 too` hm` ma`；木製拖板，人力拉運木材。

編號 2 號

【蟻子行軍】黃秋枝原作

遐日，在廳下个壁角，睺著一陣毋識睺過个蟻子，細細隻，若係無斟酌睺，猶正經會得佢走過去。一隻接一隻順地磚个縫，排列到像一條烏線。

阿弟緊拚拚，扯面紙想討拗佢猝莫，毋過佢想討研究一下，毋知佢人對哪位來个？又討去到哪位？阿妹哇哇沸，酒精罐嘴對著蟻子即噴，哪會知酒精一噴，蟻子即噴到四四散散拆陣啊，無幾久酒精揮發了，蟻子醉醒，又趕上趕落啊。

阿弟興趣趣換提著讞鏡，伏落泥下，佷去直直睺：「阿姊你人來睺！蟻子會講事哦！」

佢在阿弟个手底接著讞鏡嘛伏落泥下：「正經呢，佢人相堵頭个時務，猶會擋怙一下，親像在相借問講：『你好無？』」阿妹搶討聽蟻子講事！三姊妹即恁伏在泥下，睺了歸半晝。

落尾，蟻子像阿兵哥行軍个形，共樣个速度寬寬仔又行轉一列。親像勇敢个小尖兵，毋驚種種个阻礙和生命个危險，衝破難關排列擱出發。

佢懊惱，屋下拚掃到恁淨俐，仰子會生蟻子呢？毋過心肝又

帶疑：這陣睺起來無上目个蟻子，敢係有哪種神祕个指令和意志，堅持招伴行共個方向和固定个路線。落尾，佢查生物學个書，正知蟻子會用跔環境个變化，改變工蟻、兵蟻和蟻子个性別和數量比例，逐隻蟻子睺起來像係獨立个生命個體，毋過共時係「歸陣蟻子」个一細垵拼圖。在時間和空間以外，本來有一種生命「存在」个方式，「打散」在「群體」个內底。

當在遐查資料个時務，阿依對外頭轉來。

「阿依，阿姊在遐睺書；阿哥在遐顧蟻子；佢在遐聽蟻子講事……。」阿妹聽著阿依買菜轉來个聲，走向前去拗阿依詳細報告「蟻子行軍」新發現个一晝。

「討落雨啊，『蟻子搬屋魚反塘，三日大路變湖洋。』」阿依講，蟻子會用量早感覺著空氣个溼度，當佢人感覺溼度忒大个時務即知討落雨啊，所以討徙到較高、較安全个所在去。猶講「魚反塘」嘛共樣，天氣若熱，魚塘个水，溫度忒高，魚嗶嗶啁啁跳个現象，無幾久嘛會死去哦！

「哦，幾時係恁哦！」睺蟻子行軍个一晝，無想著成過个人生活經驗嘛恁豐富！

編號 3 號

【靚靚个東眼山】謝宜庭原作

車寬寬仔駛過彎彎幹幹个山路，佢伸手拗車个窗門壓落來，雨泥即緊拚拚跔清風從入來，帶得人一臨臨个清涼。

山路脣个圍欄面上，好定泥有幾下圖咖啡色个身影，在遐跳上跳落。佢睺到目珠睺到大嫲粒，幾時係幾下隻猴么來拗佢人相借問啊。毋過噯一瞞目又走到無睺著影啊。

雨恬啊，涼沁沁个山林內，空氣內底藏淡淡个清香，錫大家相賽行入這靚靚个樹林內。山路脣摻兜白蓬白蓬个濛，親像新娘个白頭紗，得人忍毋會核想討行俛去掀開這一緣緣个面紗，來睺新娘遐驚見笑又得人惜个面容。

一步一步行向前，即像行入仙境。路脣草蕪內个蜘蛛網面上，掛淦淦个水珠，得對雲海探頭出來个日頭光照過，一瞞一瞞金箭箭，像一張一張金熾熾个水晶網，實在靚到毋會講。

耳子脣傳來蟬「唧——唧——唧——唧——」个聲，佢捎這大聲野喉个聲哨，在大樹嶺尋著一隻蟬，脣頭猶有一個蟬殼。聽講遐又喊做「蟬蛻」抑係「蟬衣」，係一味辛涼解表个漢藥哦！佢輕輕拗這蟬歌手和蟬殼對樹嶺捉落來，得細子摸睺望佢薄薄个

翼。佢人擘開目珠金金睺，逐儕攏睺到真入神，總算知麼个係「薄如蟬翼」，麼个又喊做「金蟬脫殼」，大自然實在真心色啊！

佢展開手拗蟬放走，得著自由个佢，黏時閃入青拚拚个樹林內，加入「蟬个合唱團」，又歡歡喜喜在遐唱歌弄曲啊。連蝶小姐嘛展開自家靚靚个翼，拚命在樹林內飛上飛落，舞到活跳又心色，得人嘛想討來共下跳舞。無想著，落雨過後个樹林會恁鬧熱滾滾。

山路尾接長長个細石頭路，路脣有種歸排个楊梅樹。一粒粒青合紅个楊梅，得雨打到歸泥下，真打爽！佢偷偷撿起幾下粒，像手甲恁大个楊梅，對細子擎个雨傘擊過去，乒乒乓乓擊到砰砰。佢人「木匠揪大鋸——有來有去」，嘛跔落來撿楊梅擊倒轉來。在這條礫礫矻矻个石頭路上，逐儕攏歡喜又暢樂。

天嶺直直曠燼又鳴雷公，青狂大雨驚討來啊，攔緊來去轉啊哦！靚靚个東眼山、得人惜个蝶和蟬个歌手，有閒正來耷！

編號 4 號

【行出第一步】劉懿玲原作

人生有真多个「第一擺」，比論講細漢時第一擺騎鐵馬、第一擺跋山，出社會過後第一擺尋頭路、面試。第一擺總係得人印象真深，因為「萬事起頭難」，討行出第一步無恁簡單，愛有真大个勇氣和決心。

佢印象真深个第一擺係參加演講比賽。在參加比賽進前佢即在網路上睇過別儕比賽个影片，睇著人仰子恁慶，在臺嶼講到口涎披波攞毋會緊張，嘛問自家：「佢敢做會到？」老儕事講「敢去即一擔樵，毋敢去即屋下愁」，遐個時務佢單單一個「無要緊，挑戰睭望」个想法，即慇慇報名落去。

準備比賽个過程，心情即像洗三溫暖恁，表現好即歡喜得天，表現糗遐下嘎又目頭結結真慍悴。正開始練習个時，單單企在臺嶼講兩句事即緊張到嘟嘟顫，有時猶講到踟躕躑躑、大舌大舌。有一擺練習，佢在臺嶼講無一分鐘，續落來愛講麼个歸下添放了了，即恁在臺嶼「罰企」到鈴鳴正落臺。落臺个時佢否勢到面紅激激，見笑到尋無空好藏，實在滿足慘个！

人講「人愛人誚蹉，火愛人點著」，經過這擺失敗个經驗，

佢拗自家講定著愛較長志兜，毋會用攔發生共款个情形。想起指導佢个先生識講過：「準備个過程若係逐步行到實實在在，自然上臺即毋會緊張。」所以佢開始調整自家準備个方法，加睭新聞和文章、加聽別儕个經驗和見解、加寫演講个稿、多練習企在臺嶼講事，猶攔練習過後有問題即多問、多請教。即恁一步一腳跡，漸漸感覺自家个表現有一屑仔進步，上臺毋會攔恁緊張啊。

總算，到位上臺比賽這頭關鍵个一步，俗語講：「臺嶼三分鐘，臺下十年功。」雖然佢無用到十年个時間，毋過因為有普通時个認真練習做基礎，得佢在臺嶼講到順順序序、自信淦淦。

在講煞落臺行禮遐一瞞目，佢腦海底想起一幕幕對開始準備到這滿一路來練習个畫面。過程內底有辛苦、懊惱，嘛有快樂、歡喜，毋管比賽个結果仰子，好得遐個時決定行出第一步來報名參加比賽，這擺寶貴个經驗定著會變做佢未來生活个養分！

編號 1 號

【香絲樹<sup>1</sup>花開】邱一帆原作

四月底、五月初白色浪漫个油桐花，像白鶴仔樣仔跔等風飛啊飛仔，漸漸仔離開山林。過無幾久，對莊項看對面山个樹林頂，金黃金黃个色神，染啊山頭這一跡該一跡，就像跔等時行染色个頭那毛，係金黃色个香絲樹花開也！青青个山頭，對染上白色到黃色，換上無共樣个色神，每一個看著个人，係毋係會在自家个心肚裡激出一種相思？係毋係會產生無共樣个感覺，有無共樣个心情感受呢？

看等遠方个童年，香絲樹就生在上坪个陂塘脣，高天天个樹形，遮天蔭地，映照孿孿又孤栖个涯。涯摘下一皮青青、幼幼長長个葉仔，掄掄啊<sup>2</sup>放啊鼻公頭，就鼻著該清香、衝人<sup>3</sup>个味緒。葉仔跌落陂塘肚，浮在陂塘頂高，歸群个鯽魚仔，怕係聽著葉仔跌落的聲音，抑係鼻著該熟事个味緒，做一下蹂過來<sup>4</sup>、嘴緊吮。就像係這下蓋多遊樂區、餐廳前个陂塘項，輒常會看得著，分人餵

慣也个鯽嬭係無就南洋鯽蓋圖嚟个樣式。恁著涯還細時節，乜識目珠盯盯，看等搞寮陣手項拿等个軟冰，口涎水汀汀汀汀个樣式……。

香絲樹花開，細細蕊、黃黃个花對照等青青个樹葉仔，遠遠看啊去一等打眼，一等錫人个目珠。有人看著，會想起該燒火炭个時節，日合夜掌等炭窯，係為著燒出靚靚个香絲火炭；有人看著，會講起該拖木馬<sup>5</sup>个日仔，香絲樹筒疊出个木馬路，對山頂到山下拖等運送大樹筒，變啊幾多人衰過个黃泉路；有人看著會恁起該挖炭个歲月，透啊地泥下个炭坑，幾多个香絲枕木墊等、幾多个香絲樹樁撐等挖炭工个生命！

對面山个樹林肚裡，香絲樹緊生緊大頭。毋過這下，礦坑封起來也，無人再拿來做枕木、做樹樁；倒大樹、運樹筒个人，這下毋使用著木馬；用香絲樹燒火炭个人家、炭窯，乜緊來緊少，緊來緊罕得看著。淨留下山頂个香絲樹，年年在五、六月開出金黃色个花。

<sup>1</sup> 香絲樹：音 hiong' xi' su；相思樹。

<sup>2</sup> 掄掄啊：音 nun` nun` a`；揉一揉。

<sup>3</sup> 衝人：音 cung ngin`；嗆鼻。

<sup>4</sup> 蹂過來：音 jio' go loi`；擠過來。

<sup>5</sup> 拖木馬：音 to' mug` ma'；木製拖板，人力拉運木材。

編號 2 號

【蟻公行軍】黃秋枝原作

該日，在廳下个壁角，看著一堆無看過个蟻公，細細隻仔，係無認真看，正式會分佢騙著。一隻過一隻跔等磁磚个縫仔，排啊像一條烏線。

老弟緊拚拚仔，扯面紙想愛同佢等抹死去，但係佢想研究一下，毋知佢等對哪仔來？又愛去麼个地方？老妹嘎哇哇滾拿著酒精罐仔對等蟻公噴啊去。盲知酒精一噴，蟻公就散啊一哪仔都係。無幾久蟻公分醒，又趲上趲下也。

老弟好絕絕仔換過膨鏡，伏啊地泥下，過兼兜仔緊看：「阿姊你等來看！蟻公會講話呢！」

佢同老弟手頂个膨鏡拿過來，乜伏啊地泥下：「正式呢，佢等堵著个時節，還會停下來，蓋像在相借問講：『你好無？』」老妹乜搶等愛聽蟻公講話！三姊妹就恁仔伏在地泥下，看乜一晝邊仔。

尾項，蟻公像阿兵哥行軍樣仔，共樣个速度緩緩仔又行轉一列。親像勇敢个細阿兵哥，毋驚艱困同危險，克服難關重新出發。

佢蓋恹毋解，屋下掃啊恁淨俐，仰會生蟻公呢？毋過心肚裡又疑狐：這兜看起來毋打眼个蟻公，無成有麼个神秘个指令同意志，堅持共下行相同个方向還過固定个路線。後來，佢查生物學个書，正知蟻公做得跔等環境个變化，改變工蟻仔、兵蟻仔同公个蟻公性別、數量比例，每一隻蟻公看起來像係獨立个生命體，毋過，嘎又係「歸陣蟻公」接圖个一細塊。在時間同空間以外，原來有一種生命「存在」个方式，「散」在「群體」裡背。

正經在該查資料个時節，阿姆對外背歸來。

「阿姆，阿姊在該看書；阿哥在該掌蟻公；佢在這聽蟻公講話。」老妹聽著阿姆買菜歸來个聲音，就走過去同阿姆詳細報告「蟻公行軍」个新發現。

「會落雨也，『蟻公搬屋魚反塘，三日大路變湖洋。』」阿姆講，蟻公做得事先感受著空氣个溼氣，佢等試著溼氣忒重个時節就知愛落雨也，就會徙啊過高、過安全个地方去。還講「魚反塘」乜共樣，天時熱，魚塘个水，溫度忒高，魚仔改常嗶嗶啵啵緊跳，無幾久乜會死核唷！

「哦，原來係恁仔唷！」看蟻公行軍，正知得頭擺人个生活經驗乜恁豐富！

編號 3 號

【靚靚个東眼山】謝宜庭原作

車仔定定仔駛過彎彎幹幹个山路，佢伸手同車仔个窗仔撚下來，雨毛仔就緊拚拚仔跔等清風舂入來，帶分人一陣清涼。

山路脣个矮牆頂頂，拓拓風有幾團咖啡色个身影，在該跳上跌落。佢目珠擘啊一等大看，原來係幾隻細猴仔來同佢等相借問。毋過一瞞目嗶又瀉走也。

雨停也，涼沁沁仔个山林肚，空氣裡背有淡淡个清香，錫啊大家相爭行入這靚靚个樹林。山頂一陣一陣蓬白个濛露，就像新娘頭那頂筒等个白紗，分人蓋想愛行過去掀開這層層个面紗，來看新娘該畏羞又得人惜个面容。

一步一步行前去，就像行入仙境。路脣草堆裡背个蜷蜷絲頂頂，掛等幫滿个水珠仔，分雲海肚裡探頭出來个日頭絲晟啊去，一瞞一瞞金皙皙仔，像一個一個金若若仔个水晶網仔，實在靚啊講毋得。

耳公脣傳來蟬仔「唧——唧——唧——唧——」个聲，佢跔等這恁烈个聲說，在大樹頂頂尋著一隻蟬仔，脣口還有一個蟬仔殼。聽講該又安到「蟬蛻」抑係「蟬衣」，係一味辛涼解熱个中

藥哦！佢輕輕仔同這蟬仔歌手搭蟬仔殼對樹頂扭下來，分細人仔摸看啊厥薄薄个翼。佢等目金金仔緊看，儕儕都看啊蓋入腹，總算知啊麼个係「薄如蟬翼」，麼个又安到「金蟬脫殼」，大自然實在還生趣哪！

佢打開手巴掌同蟬仔放走，得著自由个佢，黏時飛入樹林裡背，加入「蟬仔合唱團」，又歡歡喜喜在該啦歌哩曲也。連揚蝶仔小姐也閉開自家靚靚个翼胛，盡命拈在樹林裡背飛上飛下，活跳又趣妙，分人也想愛共下跳舞。無想著，落雨過後个樹林係恁鬧熱。

山路尾接等長長个細石頭路，路脣種有歸排个楊梅樹。一粒一粒青合紅个楊梅子，分雨打啊歸地泥，還打爽哪！佢偷偷仔拈起幾粒，像手指甲恁大仔个楊梅子，對細人仔擎等个遮仔頂擲過去，並令砰朗蓋生趣。佢等「木匠擲大鋸——有來有去」也跔下來拈楊梅子擲轉來。在這條礫礫矸矸个石頭路頂，每一個人人都歡喜又暢樂。

天頂頂緊瞞燼又響雷公，怕會破大雨也，共快來歸唷！靚靚个東眼山、得人惜个揚蝶仔同蟬仔歌手，有閒正來寮！

編號 4 號

【行出第一步】劉懿玲原作

人生有蓋多個「第一擺」，比將還細時節第一擺騎自轉車、第一擺跋大山，出社會過後第一擺尋頭路、面試。第一擺總係分人印象蓋深，因為「萬事起頭難」，愛行出第一步無恁簡單，需要蓋大個膽識同決心。

佢印象最深个第一擺係參加演講比賽。參加比賽前佢就在網路項看過他人比賽个影片，看著人家仰恁壁，在臺頂項講啊口涎波潑完全毋會緊張，就問自家：「佢敢做得著？」老古人講「敢去就一擔樵，毋敢去就屋下愁」，該下仔佢單淨一個「毋怕，挑戰看啊」个想法，就慇慇仔報名也。

準備比賽个過程，心情就像洗三溫暖樣仔，表現好就一等暢，表現差該下嘎又額結結仔蓋慍悴。正開始練習个時節，單淨企在臺頂項講兩句話就緊張啊盡命牯顫，下把仔還講啊迪迪凸凸、結舌締確。有一擺練習，佢講無一分鐘，續下來愛講麼个全部記毋得淨淨，就恁仔在臺頂項「罰企」到鈴仔響正下臺。下臺个時節佢壞勢啊面紅濟借，見笑啊尋無空好庠，實在有罅慘！

人講「人愛人打落，火愛人燒著」，經過這擺失敗个經驗，

佢同自家講：定著愛過增志兜仔，做毋得再發生共樣个情形。想起指導佢个先生識講過：「準備个過程係講每一步行來實實在在，自然上臺就毋會緊張。」故所佢開始調整自家準備个方法，多看新聞同文章、多聽他人个經驗同看法、多寫演講稿仔、多練習企在臺頂項講話，還過練習過後有問題就多問、多請教。就恁仔一步一腳跡，漸漸仔測著自家个表現有息把仔進步，上臺毋會再恁緊張也。

總算，到咁上臺比賽這最重要个一步，俗話講：「臺頂三分鐘，臺下十年功。」雖然佢無花十年个時間，毋過因為有平常个煞猛練習做基礎，分佢在臺頂講來順順序序、蓋有自信。

講煞行禮下臺个時節，佢想起一幕一幕對開始準備到這下，一路里來練習个畫面。過程當中有辛苦、懊躁，乜有快樂、歡喜，不管比賽个結果仰仔，好在該時節決定行出第一步來報名參加比賽，這擺寶貴个經驗定著會變做佢未來生活个養分！